

四庫全書

集部

欽定四庫全書

集部

藍山集卷一至三

詳校官庶吉士<sub>臣</sub>朱理

中書<sub>臣</sub>劉源溥覆勘

謄錄監生<sub>臣</sub>朱起鳳

謄錄監生<sub>臣</sub>陳遂

謄錄監生<sub>臣</sub>曾照

欽定四庫全書

集部六

提要

藍山集六卷

別集類五明

臣等謹案藍山集六卷明藍仁撰仁字靜之  
崇安人明史文苑傳附載陶宗儀傳末稱元  
末杜本隱居武夷山仁與弟智往師之授以  
四明任松卿詩法遂謝科舉一意為詩後辟  
武夷書院山長遷邵武尉不赴又稱其明初

內附隨例徒臨濠則必當嘗仕張士誠又集  
中有甲寅仲冬攝官詩甲寅為洪武七年則  
放歸又嘗仕宦特其始末不可考耳仁詩規  
摹唐調而時時流入中晚蔣易作是集序稱  
其和平雅澹詞意融怡語不彫鏤氣無脂粉  
出乎性情之正而有太平之風惜其不列承  
明著作浮湛里閭傲睨林泉有達士之襟懷  
無騷人之哀怨即屢更患難而心恒裕如要

其所作皆治世之音也雖推之稍過實亦近  
之閩中詩派明一代皆祖十子而不知仁兄  
弟為之開先遂沒其創始之功非公論也明  
史藝文志載仁集六卷朱彞尊作詩綜時猶  
及見之今外間絕少傳本榕城詩話言吳焯  
家有之然吳氏藏書今進入書局者未見此  
本其存佚又不可知恐遂湮沒謹從永樂大  
典中採掇裒輯得詩五百餘篇仍釐為六卷

以符原目著之于錄焉乾隆四十六年九月  
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

藍山集卷一

明 藍仁 撰

五言古

靈鳳篇

鳴鳳出丹穴五采耀晴旭朝飲瑤池流暮棲崑山木和  
聲六律備靈德百禽伏重華去已久淳風何由復不聞  
夔樂諧但復楚歌促梧枝霜不蕃竹實冬未熟愧彼梁  
間燕雙雙托華屋

舟中望長洲田家

積流會澄川，浮沙亘長洲。  
上有佳樹林，下有良田疇。  
漁樵自成村，桑麻翳榛丘。  
犬吠林巷深，鳥鳴田舍幽。  
落日負耒歸，涼颼蕩輕舟。  
斯人亦何為，樂哉以優游。  
羈懷迫道路，悵望徒淹留。

暮宿田家作

木落天正寒，山空日將暮。  
荒村倦鳥歸，亂水行人渡。  
窮年滯草莽，短褐被霜露。  
晚宿依田家，主人情亦故。  
汲井



泉滿澗燒竹烟在戶鐘殘溪上村月照堦前樹濁酒初  
潑醅嘉蔬亦時具且慰飢渴懷况諳村野趣老翁八十  
餘有子役征戍秔稻歲暮收官司日加賦我願息兵戈  
海宇重農務愧乏經濟材徒然守章句

擬貧士二首

蠨蛸網我戶蟋蟀號我壁被褐不掩脛采薇豈充食歲  
有飢寒憂巷無車馬跡豈知曠達觀不以貧病迫昔聞  
孔顏聖亦有陳蔡厄澹然忘世慮弦歌自朝夕

蓬門有一士被褐恒苦飢朝飲南澗流暮食西山芝雖  
有二頃園蕪穢亦不治妻子共寂寞彈琴詠詩書荒林  
積雪深古屋炊烟遲高卧自有適何必他人知

在野

慕榮非素心在野甘自晦泉分九井注門掩千峰對犬  
吠秋草根鶴鳴白雲外茅簷有濁醪田翁夜相會

暮秋懷鄭居貞

季秋霜露降草木日已哀暮登城門丘遙望滄海涯鳥

鳴求其羣況在遠別離美人美如玉夢寐恒見之飄蕭  
紫鳳毛照耀珊瑚枝海水不可越丹砂詎能期濫濫杯  
中酒泠泠桐上絲豈無一日歡念子來何時少壯難合  
并流光倏如馳悠悠逝川歎渺渺停雲思

西山暮歸

涼葉墮微風秋山正蕭爽天寒獨鳥歸日夕百虫響偶  
從桂樹招遂有桃源想石磴閒無人山猿自來往

暮歸山中

暮歸山色昏濯足月在澗衡門棲鵲定暗樹流螢亂妻  
孀候我至明燈供蔬飯佇立松桂涼疎星隔河漢

宿田家望武夷山

仙崖蓄靈異怪石盤空曲一水隔花源千峯入茆屋金  
芝暖逾秀瑤草寒更綠雲中武夷仙一一顏如玉白馬  
去不歸玄猿叫相逐昔陪丹丘侶酣歌紫霞谷鷄鳴洞  
天曉落月在林木空瞻仙子高舊夢那可續荒林激悲  
風日入對樵牧佇立望歸雲解衣田舍宿

少年行

東家少年子挺挺七尺軀適遭風塵起應募趨名都  
明甲金鐵堅寶刀冰雪如朝隨霍嫖姚暮逐李輕車  
手挽二石弓腰懸雙虎符擊刺當萬人飛揚凌八區  
椎牛會賓客考鼓吹笙竽意氣擬卿相光輝生里閭  
西鄰有迂士白首講玄虛貧無擔石儲富有萬卷書

捕魚

漁人騁技巧長網截大川萬魚不能脫已知數當然傾

城食鮮膾維舟洗腥涎猶有鮫鱈存食人市門邊

待渡

早出未開關暮歸常待渡誅求尚多門辛苦在長路浩  
浩川上波蕭蕭道旁樹百役幾時休臨流愧鷗鷺

拙者自號

吾生何為者老以拙自名眼拙搖空花耳拙起虛鳴手  
拙持戰栗足拙方歌傾寸心更苦拙百事無一成語言  
拙少味交遊拙寡情學拙志慮耗道拙憂患并行當死

於拙掩骨依先塋傍人笑我拙我拙亦有程聖賢既不  
辭愚下孰敢爭孔子拙陳蔡伊尹拙割烹呂拙釣尚直  
陶拙琴無聲夷齊拙不食古道誰人行我拙不有命我  
拙自有誠寧甘抱拙枯不作背拙榮傳拙與子孫用拙  
盡平生

祭虎二首

猛虎在前林羣豕踐我黍飢來搏食之絕跡秋田裏虎  
非獸之良推功及田父流傳不可忘南村朝祭虎

祭虎虎何功云能食封豕封豕善遁藏充腸得仙麋仙  
麋雖馴良入口那復吐虎去不復來居然暴禾黍

七言古

長韻句附

為方煥賦雲峯秋霽圖

茆屋溪頭紅葉村石梁秋水清無痕粉榆過雨鳥鳴澗  
秔稻如雲山對門老翁日高睡未起稚子讀書窗戶裏  
干戈如此賦斂煩雞犬晏然鄉曲喜山中酒熟黃花開  
仙人候我芙蓉臺雲林今夜好明月擬跨幔亭黃鶴來



題鄭德彰員外所藏高彥敬畫楚江春曉圖

旭日未出羣山昏蒼茫楚江多白雲芳洲無人採蘅杜  
落花飛絮春紛紛晴嵐滿戶漁家曉花枝彷彿聞啼鳥  
巫陽夢斷三峽空湘渚愁深九疑小文彩風流高尚書  
如此江山歸畫圖平蕪煙藹水空濶陰壑松檜天模糊  
左司郎官何處得高堂紫翠生春色是中宜有五湖人  
一葉扁舟蕩空碧風塵兵革浩茫茫對此便欲歌滄浪  
碧梧翠竹生高岡豈無彩鳳鳴朝陽

水南山房詩為任立本賦

南溪白雲白如練萬壑松蘿對山縣幽人結屋溪上居  
稚子過庭能讀書清流美竹秋瀟灑斐几明窗日閒暇  
坐中徃徃見樵漁門外時時駐車馬盛世絃歌比屋聞  
淮南兵革又紛紛平川戰血流成海白日妖氛漲作雲  
一自離家從部曲夢繞故山煙水綠被褐愁趨戎馬羣  
牽蘿誰補南溪屋近隨都尉入關中遠逐嫖姚樹戰功  
匣底笑看三尺劍尊前起舞舞萬人雄三年留滯關山外環

堵蓬蒿果安在荒林猿鶴怨秋風落日魚龍愁遠海時  
清方且歸去來他鄉道路多塵埃有才未必長在野君  
王已築黃金臺

題劉商觀奕圖

遙峯蒼蒼松檜色澗水無聲晚煙白圍棋不見商山翁  
伐木那逢會稽客行人遙指爛柯山洞裏羣仙白晝閒  
石床對奕豈知久樵子旁觀殊未還執柯却坐莓苔石  
勝負眼前誇得失石爛松枯不計年雲子瓊漿堪度日

斧柯已爛下山遲城郭雖存故舊非處處桃花無路入  
雙雙白鶴背人飛仙遊寂寞秋山裏圖畫千年尚如此  
社稷山河幾局新地老天荒遺數子君看滄海變桑田  
一木不支何足憐

余復嬰近以方壺所寫大王峯轉惠暇日展玩  
殊有幽趣因題

方壺畫山世有名生紙一幅塗縱橫孤峯倚天旭日上  
危石拔地秋風生壯遊曾來拾瑤草夢裏武夷清未了

紫陽五曲石門荒金老三間茅屋小興來放筆起層巒  
萬仞嵯峨咫尺間龍洞雲煙含宿雨鶴壇星月滿空山  
武林道士余三一來憩松根講周易十年不出鬢垂絲  
九轉將成眼如漆新圖千里寄神交東南一柱青天高  
願授神方服石髓共聽仙樂鳴雲璈閒窗持贈深有意  
念我衰年住塵世便欲呼兒挽鹿車從此相隨入蒼翠

題歐陽楚翁梅竹畫

道人下筆天機熟宋末元初寫梅竹琅玕箇箇起中林

瓊樹娟娟在空谷三花五葉天然好直節心虛肯相保  
花光老可費經營和靖子猷驚絕倒兵戈流落存者稀  
展玩茆屋生光輝羅浮月色忽在手渭川白雲隨我飛  
此翁亦是英雄輩事異時非聊自晦百年翰墨可流傳  
開圖靜與儀刑對

悲流人

為農未免租調癡從軍可辭刀箭痕布衣一日任民社  
鞭撻不救肌膚完足兵足食萬世計征衣戰甲無寧歲

但知城郭倍光輝誰問閭閻久凋敝深機巧宦何為者  
暴虐施民自寬假山頭白石城下泥已有行人先問舍  
前車後車相繼摧滿山枯骨白成堆嗚呼古人不可作  
自書下考真賢哉

題馬大使青城圖

青城丈人高入雲野老未識應先聞畫圖朝開拭我目  
興入深谷窮其源四川號雄觀五嶽爭推尊昔在漢季  
老仙伯燒丹井竈今仍存二十四治屬呵禁鬼魅不得

侵人羣後來肥遁更多士採芝斲藥深林裏樵夫誤到  
老人村世代傳流長孫子馬卿食祿東南隅思山願乞  
明年歸祇今聖代重養老春風會送斑斕衣

惜猫怨

山人養猫俊而小畏渴憐飢惜於寶一鳴四壁鼠穴空  
卧向花陰攫飛鳥隣家畜犬老更狂狹路相逢力不當  
吁嗟猫死難再得惡物居然年命長

放歌一首效蘇仲簡



萬方一日綱紀新四夷重譯來稱臣  
白頭山癯驚且喜  
托身兩代耕桑民桑田海水千年改  
霜木晨星幾人在  
老馬空嘶皂櫪間驚鴻已出虞羅外  
旁求都邑及山林  
兵選三丁儒一丁裂荷焚芟別山谷  
帶牛佩犢趨邊庭  
萬人坑平百草綠風雨年年寡妻哭  
縱有生還老退身  
疾疢傷殘形不足我生不豫功名期  
先朝未壯今衰羸  
夕陽漸挂首丘樹當歌一放誰能悲

野鷹

野鷹棲老江邊樹整刷毛衣矜爪距深林未見攫妖狐  
近市且知爭腐鼠天生羽族誰爾雄爾德不肖形軀同  
雲霄真骨死炎瘴來者如斯往者空

題秋山訪隱圖

遙峯蒼蒼白雲白紅樹黃花間秋色三徑曾尋蔣詡居  
一區尚憶揚雄宅十年不見鶴田翁遠水長山入夢中  
涼颼散榮遠林靜微雨濕衣空翠濃先生見客幡然出  
髮短眉長眼如漆窮高極厚作千年虛往實歸凡幾日

畫圖絕似鶴田秋不許同行只獨遊  
黃綺正須天子召  
巢由底用世人求

雪中候雲壑不至書懷兼柬雲松昆仲

卧病空山連日雪崖谷平沉高石沒朝暉倚杖坐茆簷  
夜氣擁爐燒榾柮兵選三丁壯者稀祇餘翁媪守柴扉  
秋霜早殺空晚稼寒機盡用無冬衣聽說誅求愈悽惻  
轉憶承平樂耕織暖入狐裘念苦寒飽分玉食憐飢色  
九折危途一道溪故人相望阻攀躋惜乏籃輿度雪水

安得青鞵踏雪泥

廬峯絕頂阻雪書寄雲松

昨日籃輿不得上今日籃輿不得下  
天花萬點散長空白雲  
一月包青野山空雪霽日色微風前猶作落梅飛  
闌風玄圃  
在人世夜景若晝騰光輝  
却屋閉門愁出入履破衣穿寒轉  
襲揮毫三復白雪吟手足凍僵才思澁  
張老屏山賞又新應  
披鶴氅對嶙峋  
長篇短幅述清語  
定有瓊瑤報故人

海上行送舒文質之京赴危大參之招

海門五月南風高，龍驤萬斛如鴻毛。  
蓬萊方丈渺何許，但見吞天沃日之洪濤。  
龍光蜃氣迷咫尺，夜看星辰朝看日。  
居庸如天入海青，玉樓十二通仙靈。  
仙人樓居龍衮明，二十八宿風雲生。  
山人曾駕遼東鶴，秋入瀛洲採靈藥。  
歸來塵土三十年，至今夢想鈞天樂。  
十月北風鴻燕翔，羽人遺我雲錦裳。  
紛紛霪雨暗八荒，子胡不歸白玉堂。  
山人笑與青山別，夜鶴秋猿意悽惻。  
有書伏闕救瘡痍，江南小臣如蟻蝨。  
吾聞東海百谷王，有如宸居朝

四方江淮道路日流血海若率職能令海道成康莊吳  
檣楚柁千艘入白粲紅陳萬倉積近傳渤海罷干戈復  
道塗山來玉帛我歌海上行送子萬里情匣中雙吳鉤  
忽作蛟龍鳴安得持之獻天子一掃六合風塵清

題春雨藍澗圖

雲煙慘慘春林裏風雨瀟瀟澗聲起荷笠宜耕桑柘村  
持竿欲釣桃花水吾弟俊年多讀書生怕軒冕來相拘  
布衣擬就澗邊老草坐似習山中癯朝廷偶說通賢路

州縣臨門逼人去秋天嶺海下鷹鷂落日川原肅狐兔  
清才直氣不入時坐守古道衝危機無人更掃藍澗屋  
有墓已題春雨碑

醉歌一首送劉蘭室還建溪兼問蘇明遠椿桂  
憶昔下馬扣我門惠連種豆歸南村脫巾漉酒共一醉  
秉燭題詩期再論人生安得長相見世事誰知回首變  
惆悵鵠原負急難淒涼鶴髮甘貧賤清尊重對黃花前  
更為後會知何年菟裘問地君思隱蛻骨名山吾欲仙

霞洲玉洞秋風老更有何人拾瑤草因君為我問三蘇  
墨池霜菊年年好

酬劉蘭室題墨菊扇寄惠

白團誰寫秋風曲寄我茆齋掃炎燠新紈皎潔一尺冰  
濃墨淋漓數枝菊摩挲雙眼老復明興入東籬餐落英  
蘇仙筆下雲霧濕劉侯句裏烟霞清一丘養拙南山側  
敢擬柴桑舊時宅清節誰憐白髮翁壯懷不倚黃金色  
故人嘉會不可忘永日清風吹我裳長隨懷袖送月影



更入篋筒生虹光

范伯剛為予作翠屏別墅圖因賦雲林茅屋歌

我昔結屋依雲林開窓正對浮雲岑  
山花爛漫散春色崖木慘淡垂秋陰  
籃輿欲往空費力十步五步還坐息  
日斜又向茅屋歸惆悵三年登未得  
范寬生紙寫作圖中堂忽見遙峯孤  
白雲黃霧自舒卷濕翠晴嵐時有無  
半空石壁懸飛瀑下有良田藝桑竹  
買牛春雨早歸耕莫遣兒孫忘鄉曲

重題虛白道院

并序

吾弟虛白居西山學道之七年歲在庚寅八月初四日有羽士相過蓬頭眇目敝衣破笠杖懸藥瓢數十鏗戛有聲既至門相見揖讓周旋之禮頗疎供茶與粥俱不入口翩然即辭而去明日鄉鄰有至山者云昨日有一道人云自海上來問西山路去訪藍道人投機一宿不投機即行沿途施藥請服之者病輒

愈詢之數十里間同日俱見遂遍訪求之竟  
無及矣虛白不勝悵然蓋其志勤於慕道仙  
者特來觀察焉後數年虛白仙去其事少知  
之者暇日重過林下有感前事遂題長句俾  
有志於道者知學仙之不妄也時戊午三月  
藍山拙者書

吾弟再來人弱齡志神仙師事月間老辛苦二十年丹  
書墨符役神鬼白日青天致風雨元陽真火分濟人不

俾世間羸瘵苦西山松栢裏仙人有舊廬白雲長芝草青  
霞護道書林居園屋奠八卦草衣木食參玄化宴坐靈  
龜息漸微空歌白鶴飛初夏青春三十功累成名列丹  
臺玉署深蓬萊官府案行密特遣仙者來中林瓢笠過  
門日常午一語不合幡然去杖藜揮袂風飄飄回首雲  
深不知處微言至理豈易逢仙緣尚隔一塵中前程悵  
望鸞鳳遠遺蛻偶與蛇蟬同學仙求道難如此拔宅徒  
勞慕劉許我來撫景重興懷滿林白石空延佇

候劉蘭室不至

送君上京師懷君來武夷黃花開口向我笑不肯握手  
趨東籬草堂正在藍澗底年年風雨花如此架上殘編  
落蠹魚尊中濁酒軋浮蟻期君逾月君不來日日鞍馬  
驅塵埃軍符侯印生白髮石田茆屋荒蒼苔世上功名  
休便得有子況能傳父職倘入廬山訪社蓮為報陶潛  
久相憶

白雪歌

南州大雪從來少數日山莊三尺厚一點遊塵着處無  
四簷明月連宵有瓊樹應迷谷口樵玉簑不脫溪邊叟  
清池片石疊寒氈遠岫疎松排禿帚鳶肩獨聳費吟哦  
鶴髮相輝惜衰朽梅清竹瘦轉憑陵鳥仆猿僵罷飛走  
孤煙冷舍自無聊橫寶當途誰得取宜消瘴癘拯羣黎  
忽報豐登隨衆口高士軒中愛煮茶將軍帳下催斟酒  
種石辛勤壁在田照書爛漫珠盈斗陰崖北向雲影開  
旭日東來澗聲吼眼前光景漸消磨石門天柱長回首

題南山秋色

憶昔弱冠心冥頑趨庭侍訓溪南山綵衣朝日動春色  
蕙帳秋風生夜寒三年奔走衡湘間候問寢食通平安  
歸田在念竟莫遂陟岵引領空長嘆結廬新阡陟松栢  
捧土涕淚垂洟瀾仙人怪我久不返畫圖寄示青巔岼  
雲霞映隱石崖紫霜露點染楓林丹舊時猿鶴良有待  
向夕漁樵相與還催呼童僕與老母杖藜入谷尋柴關  
躬耕力學企先志絕頂爽氣窮躋攀

題雲松九江秀色圖 方壺畫

淵明柳太白松九江千載生清風後來張籍學稽古志  
操却與前賢同早年仕宦遊闕中白頭不歸鄉井空長  
思故業勞夢寐舊攬秀色積幽衷琵琶亭香爐峰傷離  
恨別不足較尋幽望遠將誰從題書招小宋揮筆煩壺  
公青山白雲負輕策落霞秋水浮孤蓬昨日携圖來叩  
戶品題愧我非才雄江山如此遊不到惆悵一生田舍  
翁



贈武夷魏士達

武夷山水天下無層巒疊嶂皆畫圖神奇直疑混沌鑿  
秦漢而下靈仙都中天積翠開宮殿石壁紅光夜如電  
鸞鳳常驂神姥遊猿猴共醉曾孫燕洞中別有昇真天  
瓊林遺蛻如枯蟬露盤仙掌千年藥春水桃花九曲泉  
萬松岡頭羽衣客更入三山採真訣神遊不計海天遙  
夢覺長懷山月白歸來高隱萬年宮天香時降雙青童  
道參元始鴻濛外身寄虛空象緯中嗟予久慕煙霞侶

天遣空山作詩苦清歌曾遶幔亭雲凍筆空題草堂雨  
金丹擬就玉蟾分木葉西風鐵笛聞野老只知堯舜世  
樵夫或遇武夷君黃塵白髮悲年暮回首蓬萊更何處  
病容豈是學仙才儒術元非濟時具余侯留滯海南居  
鴻鴈來時一寄書期君天柱之南隱屏之北共斲黃精  
煮山雪

又次國學生朱士堅遊武夷韻

春風吹船泛中流千巖萬壑開滄洲空林濕翠散晴旭

絕頂爽氣生清秋  
皇華咨訪成幽趣  
水木蒼蒼遠參互  
鷗起如驚使節來  
猿啼似怨山人去  
隱屏峯下平林路  
漁父壇邊文杏樹  
草生書帶不多春  
空與山麋野鹿鄰  
杖藜或可共避世  
拂衣誰許是知津  
羽人稀少雲邊住  
回首人間障塵霧  
半夜松聲遠浦潮  
終朝嵐氣前峰雨  
金雞啼月響仙機  
四海秋風豈不知  
乘槎徑欲問織女  
杼軸常空終自疑  
靈芝仙草迷荒麓  
盡日盈檐采新綠  
興盡重尋洞口回  
詩成尚憶山中宿  
清溪從此別漁樵

六翮仍看上九霄歸朝應傍薇花立在野難歌桂樹招  
故人張籍同官舍倘問山林衰病者食力非邀谷口名  
灰心已入廬山社

題清江碧嶂集追懷清碧杜先生

山中之人號雲壑落日題詩寄谿閣示我清江碧嶂詩  
開卷清風滿寥廓憶昨先生林下居黃花翠竹臨階除  
平生不受天子祿老向名山空著書十年死別如朝暮  
一望孤墳淚如雨往事悠悠歎逝川遺編零落俱塵土

江湖耆舊晚更稀此卷乃出幽人為細書深刻不易得  
短咏長歌勞我思虞楊范揭名當代猶敬先生師法在  
祇今餘子徒紛紛敢以涓流敵滄海清廟之瑟朱絲絃  
九臯鶴唳聲清圓波濤萬頃注三峽魑魅九鼎傳千年  
吁嗟古人多泯沒一字流傳風漸歇高情古調人莫知  
夜久長松轉霜月

清明

清明日大風起紙錢飛作灰散落千山與萬水舊墳間

新墓哀哀哭不已百役轉溝壑首丘寧有幾朝廷自忠  
厚惻然念無祀天下向萬域科條戒鄉里緇黃施法食  
縣官具羊豕日是天暝晦陰靈集壇所飲食散饗餘似  
聞相告語秋冬復繼惠有後竟何似長林或掃松荒阡  
誰掛紙生者不自給死者長已矣因思上世人未明仙  
佛理諸儒動引經不肯祭非鬼推思九泉下著令今代  
始從知征戰場飢餓怨千古

欽定四庫全書

藍山集卷二

明 藍仁 撰

五言律詩

五排  
附

颶風

海上颶風來乾坤吼萬雷旋毛將巨木驅石似輕埃晝  
夜聲同怒陰陽召此災殺機何日息天際暮雲開

題武季遠竹木圖

輕紈剪霜素妙墨寫秋林脩竹露華潤石崖雲氣深鳳

棲淇水暮龍化渭川陰載美武公德永懷單父琴

雨中懷子治兼善

去年秋社別今雨草堂思  
哀病難為況睽離已許時  
連床談舊事對酒誦新詩  
清夜簷花落休忘鄭老期

題愚齋卷二首

丈室愚名扁西家笑讀書  
力行非甯及私省豈回如孟  
谷呼相應柳溪閒可漁  
終知移不得直詐古今殊

武健惟材任齋居豈強名  
奇兵長自用困學久須明  
不



徑心常正移山氣未平功成應養晦冠弁似儒生

丙寅正月三日作二首

開歲仍愁雨交春已聽雷哀容萬感集生意幾時回  
強飯扶斑杖巡簷看落梅敝衣風更冷吹送雪花來  
書罷迎春帖家家應節多老年難再拜佳客莫相過  
閉戶唯僮卧臨觴忽放歌太平宜有待暮色欲如何

人日偶成

七日本宜晴愁人風雨聲厨煙侵几濕簷瀑隔窓明楊

金一八  
卷二  
柳顰何事梅花笑不成呼兒催酌酒一醉百憂輕

又人日懷雲松

七日始為人寒風未似春長吟呵筆久獨坐擁爐頻仙茗烹松雪山醅漉葛巾如何卷南北偏側不相親

又人日懷兼善

元日至人日簷聲斷復聞山頭雪待雪溪上雲連雲牧犢空年老聽鷄過夜分平川張逸士最念久離羣

春日

陋巷斷人行柴門不用扃  
衰年栢酒綠春日菜盤青  
強飲鄰翁對長歌稚子聽  
午牕閒試墨只寫相牛經

又

草木消冰雪林園換歲時  
病傳方士劑閒詠古人詩  
兄弟飄零恨兒孫懶鈍姿  
一盃春日酒無奈醒愁悲

齒落

池草夢難成風蟬斷又鳴  
衰年惟有睡浮世自多驚  
映日攜書近分泉滴硯清  
如何牙齒落更欲較詩名

喜雨

數夜不能寐乾坤如大爐衰顏值炎赫生意轉焦枯偶  
聽雷霆過仍看雨澤俱茅齋慰岑寂涼思滿桑榆

雨中

淫雨仍無賴名花亦自殘林深雲久暗城晚雪猶寒問  
栗瓶長罄呼尊酒已乾衰年將百慮惆悵獨凭欄  
久雨不能休花時慘似秋牛羊僵在野魚鼈困中流敢  
歎泥塗苦長懷畎畝憂滂沱非潤物天意遠難求

燕仆多空壘鶯僵在遠林春霜晴不久社雨冷難禁  
妄動徵前失深藏異此心故山棲老鶴永夜自長吟  
冰雪似三冬鶯花又一空毛寒誰問馬指直久妨農和  
氣從今轉嚴威未可窮野人時望日霽色露前峯

雨脚

雨脚時時急谿頭日日渾漁舟侵野市虎跡遍荒村  
老去心空壯憂來眼併昏無生差近理欲究梵王言

雨歇用前韻

雨歇塵仍暗秋來水更渾  
草深迷虎穴霧重失漁村  
生理何多難吟懷久已昏  
徬徨如有得惆悵竟無言

挽趙子將三首

四十身先死才名奈爾何  
山川千里隔風雨九原多  
已負雲霄志空傷薤露歌  
無書問妻子有淚逐江波

北闕諸公薦江西一命榮  
窮途淹疾病造物忌才名  
牢落逢兵甲睽離異死生  
天長鴻鴈去揮淚望江城

短櫂浮滄海清詩滿翰林  
幽人中夜泣壯士百年心  
白

日人間盡黃泉地下深秋風歌楚些山雨應猿吟

挽空無相四首

避名依野老危行托狂僧蹈海非今日尋山住上層黃  
龍持鈍斧雪嶠撥殘燈自了英雄志居然契大乘

靈象何人識冥鴻有客思虛空無住著矰繳枉勞施明  
月浮杯遠孤雲振策遲萬人看出處示寂在京師

二十三年別頭顱故不同遊方何處止求相本來空法  
海龍應化塵樊鶴在籠三生石上月誰問牧牛童

西山塵境外水木本清虛自結詩書侶長留仙佛居  
顛汪遺蛻後狂李涅槃初重會知何日衰顏豈待渠

東雲松

我老君長健君賢我不能文宗曾子固篆逼李陽冰  
几杖山林願門生月旦稱鄰州同景仰爭畏鶴書徵

有感

玉石何勞辨兵農不必分異方投體魄非罪及兒孫  
部伍年年定飢寒處處聞荒田兼廢屋愁眼對秋原



嫁女先鄰近誰言有遠征長號辭母去無力逐夫行顏  
貌銷前日憂虞送此生遙知膏野草青塚祇虛名

道路頻徵發悲號孰忍聽老翁憂絕嗣童子畏成丁飯  
乞嗟來食衣牽不掩形風沙連雨雪萬里到邊庭

衣食推溫飽詩書輔守成危機憂不免謗語禍非輕溫  
清三年隔艱難萬里情天倫不相保人世欲無生

鰥獨須仁政承宣待上官更饒多病苦那解百憂寬邊  
郡書稀到衣襟淚不乾南人西北老天遠問應難

大同路石佛谷過啼哭嶺

雲京石寺遊西北上豐州山險為啼哭路艱成阻脩聞  
名心已碎未見淚先流萬里江南客那堪過嶺頭

自傷

天地為羅網梟鷲一死生英雄莫自悔骨相或當黥照  
影渾疑鬼殘形已作兵詩書翻誤世戈甲可收名

柳隘嶺上

黎村雲洞北柳隘石門西萬木秋初落千峯曉更迷猿

垂深澗飲馬入白雲嘶攬轡炎荒外恩疑雨露低

過雲洞嶺

路出千秋迥山連五嶺遙石崖懸度棧野樹卧通橋澗  
飲猶防蠱畚耕盡屬猺夕陽驅瘦馬鬢影漫蕭蕭

秋江待渡

野水蒼茫夕雲山慘淡秋暫停征路策遙喚隔溪舟  
店關門早僧鐘出寺幽哀年懷遠道禁得暮歸愁

賓州九日作

三年頻客路九日又賓州野圃黃花晚空江白鴈秋無  
錢從止酒有賦倦登樓回首關山遠蕭蕭落葉愁

蒼梧夜坐

天闊蒼梧夜江清碧草春殘花宜對酒明月暫隨人白  
雪知音少青山入夢頻還鄉恐未遂魚鳥漫相親

毒霧

大霧無時起冥冥夜色同江連蛟蜃氣野匿虎狼蹤久  
暗應成雨遲收欲待風南山沈已盡留得兩三峯

竹搔背

裂竹供哀病能分子姪勞周身尋痛癢到手助爬搔野  
服同捫蝨仙經似伐毛自慚鮎背及此物敢忘勞  
削竹名何器年來試用頻揩摩長在手痛癢不求人刻  
畫兒童掌追隨老病身渭川淇澳際託分久相親

題志玄崎嶇窈窕卷

青牛去不返黃鶴已難追獨羨持初志長齋似舊時洞  
天尋伴侶丹火慕真師他日緱山頂家人待一辭

書悶二首

苦節從人笑端居拙自謀  
奸邪頻得志忠信動成仇  
世故只如此吾生行已休  
少來不解飲老去付乾愁  
讒言投毒藥非罪觸嚴刑  
萬里邊沙白孤魂暮草青  
倚門空悵望主器尚零丁  
天道闕人事誰分渭與涇

藍澗襟詩五首

郭外茅亭小門前澗水清  
諸生時問字野老盡知名  
移竹須春雨看山待晚晴  
年來疎懶甚著述苦無成

碧草雲連屋黃山暮入簾養生思橘井曝背戀茅簷雪  
為觀書積泉因洗藥添懶從閒轉甚貧與病相兼  
蘚徑沿溪滑柴門倚樹欹看雲行自遠卧雪起常遲白  
日蹉跎過玄經寂寞為不甘在野非是傲明時  
寂寞揚雄宅荒蕪董子園生涯謀轉拙儒術道空存野  
竹鈔書盡清池洗墨渾唯應門外水花發似桃源  
避人常獨卧借地遂幽居多病勤栽藥無言懶著書山  
光兼落日竹色共寒蔬故舊如相遇休嗔禮法疎

題劉伯壽菊逸卷

種菊寧無意幽居得自怡  
丘園臨晚節霜露傲寒枝  
逐客餐英夕休官待酒時  
清風與高致千載重相期

病中

卧病秋將盡艱難日又增  
夜深方著枕戶遠更留燈  
鄰畏呻吟近僮來抑按能有身  
應有患空寂未如僧

病起

帶緩肌如削巾欹髮半垂  
故人憐病起稚子笑行遲  
卻



酒憂成醉收書老更癡滿岡梧竹盡尚想鳳棲時

寄余復嬰

道士清溪住扁舟久未回井垂霜後橘門掩雨前苔  
鳬舫長相候魚書杳不來虹橋他日宴又負紫霞杯

寄雲松昆仲

丘園無雅況經訓有餘閒偶過柴門外相期樂肆間  
談詩不知倦看畫欲忘還二仲稱儀表衰容詎可攀

經趙師節故居

五畝城邊宅過門憶往年病拋詩社卷貧索酒家錢古  
道能追轍新聲不改絃鹿門秋月色因照德公阡

題伯穎雲林茅屋圖

將軍今為庶茅屋住雲林白帽長年著黃精積雪尋已  
聞瓜地近更說鹿門深猿鶴頻來往真知避世心

中林避世士茅屋一間雲雨笠尋芝朮晴窓究典墳竹  
深羊仲至瓜熟邵平分也有幽棲處長隨鹿豕羣

避人深卜隱食力自為園賣藥從過市催租不到門厨

煙蒸朮起社酒漉醅渾風雨相期夜詩成更細論

環谷

余國權名行亭曰環谷中以舊得朱子所書  
風月無邊字扁之題詩四首

雲谷留雲墨瀟溪有似人園林當勝夕尊俎集賢賓天  
籟飛來遠冰輪洗出新乾坤清氣滿何處有罍塵  
無邊風月興盡在此亭中几杖清秋近絃歌白晝同名  
書懸舊扁畫筆付良工髣髴瑯琊勝能文憶醉翁

華亭當谷口風月興無邊草木聲相應山河影倒懸衣  
巾涼氣襲杯竿素光傳折簡能招我論詩夜不眠  
風來環谷迥月出野亭幽樹靜泉聲細天清露彩收長  
留佳客坐偏與阿戎遊共有司空趣輸君未老休

題觀音巖

石色依廬阜潮音接普陀江雲晴自遠水月夜還多鳥  
為銜花至龍因問法過辦香瞻彷彿帆影拂嵯峨

寄示姪澤

五姪緣思孝陳情不肯休一杯原上土三載獄中囚霜  
露空山道風煙拱木秋蓼莪停誦處遠想淚雙流

非昔

覽鏡驚毛髮殊非宿昔翁狂來詩有興愁極酒無功久  
病成真跛流言息近聲明知過相問起坐夕陽中

別雲壑

枉策來相訪衡門宜暫留故情憐獨老清論慰窮愁  
芋火寒初撥藜羹暖未收歸心何偏側又宿水東頭

送別歐陽雪舟

已是三年別那知一笑俱相看  
歌白雪獨往往在都畫  
馬塵生壁籠鵝雨滿湖松門清夜月還念故人無

詠千枝柏

獨幹千枝長濃陰萬葉稠  
傍簷低翠蓋對坐擁青油  
霜雪兼松茂風煙帶柳柔  
舊栽祠觀裏曾繫老君牛

秋夕懷武夷舊業

客路西風晚懷山獨夜愁  
露寒仙掌月天遠幔亭秋  
落

葉他鄉夢啼鳥何處樓歸心似江水千里向東流

時事

治國宜寬典新民在布恩欲追三代盛莫使一夫冤引  
善猶連茹銷愆若救燔流傳千萬葉端拱御乾坤  
久歎旌賢少還聞剪惡多生材不易得曠職欲如何進  
退皆由道明良自有歌邦基百度舉不獨壯山河  
列宿郎官位嚴霜御史威銓衡須有見負乘乃無譏經  
術存公正刑章折是非地天交始泰全欲慎先機

昨日天恩及生民解倒懸俘囚空在獄羸老並歸田和  
氣當成歲驕陽莫作愆叨逢雷雨解喜動白頭年

寄周子治

周子能文士攜家入武夷地幽真可隱席暖不須移融  
帳開何日牙琴聽有時扁舟衝野雪卧病久相思

寄杜德基

聞說徵君後猶存版築中天恩何日及世道此時窮黃  
耳書難保青蚨篋已空倚門惟有母華髮對秋風



寄毛伯善

狂樂勿相依平生變是非大呼將蹈刃急走不披衣學  
仕斯難信思親或欲歸慙慙提耳誨莫與聖賢違

代毛生答

浮世容身狹韶光過眼非瓦盆盛社酒槲葉製秋衣禮  
樂休拘束漁樵乞放歸前林逐麋鹿未與素心違

寄李孟和

同學朝冠士投簪幾日歸里中朱紱少世上白頭稀隴

黍登新酒池荷足故衣夕陽天際鳥還向北林飛

寄張雲松

關塞風塵暗山林出處難生涯謀釣艇世事笑儒冠有  
酒拚長醉無衣度苦寒南山有奇士扣角夜漫漫

九日病中

伏枕山林遠閉門風雨深一秋貧轉甚九日病兼侵落  
葉荒三徑窮愁迫寸心細看黃菊蕊空感白頭吟

寄雲松先生隱居五首

風雨論交舊林塘卜築新幽棲兼令弟高卧愧時人竹  
日明書帙溪雲覆釣緜林居無俗客麋鹿自相親

濟世須豪傑斯人老澗阿別離知己少辛苦著書多村  
晚收杭稻天寒製芰荷南山今夜月誰聽飯牛歌

蜀郡文風盛屏山道學高承顏勤菽水壯志恥蓬蒿春  
日營三逕秋風歎二毛時逢見烽火轉覺寸心勞

前賢已淪落古學更誰知臨編鍾王帖吟成魏晉詩青  
燈懷舊雨白首嘆平時亦有山林興何時共采芝

立雪平川日同門最老成  
干戈拚死難釣築負平生力  
盡追風雅途窮念弟兄  
遺編共朝夕應見百年情

山中漫題

平生江海興閑戶老巖阿  
晚景寒山淨秋聲落葉多  
詩成樵客和酒熟羽人過  
叢菊蕭疎甚其如蔓草何

乾坤千古事風雨百年心  
野興供高卧窮愁費苦吟  
荷衣秋色老茅屋夜寒深  
蓬鬢看霜葉蕭蕭不自禁

讀書期有用閑戶心無能  
落葉空山雨疎鐘獨夜燈  
人

稱樗里子住近石門僧靜坐觀詩妙須參最上乘  
偶依松石坐閒詠草堂詩宿鶴林中靜歸雲川上遲千  
峯秋似水多難鬢成絲自識盈虛理浮生更不疑  
寥落三冬學棲遲十載心寒雲龍戰野暮雪鳥歸林狂  
客歌徒苦愚公谷自深匣琴流水調歲晚念知音  
風雨鷄聲亂雲山鶴夢清自非諸葛卧誰有魯連名碧  
海堪垂釣黃河未洗兵鏡中看短髮種種負平生

山居

數月方休沐山行不覺勞塵容渾老盡詩思與秋高飯  
顆應逢杜柴桑未入陶閭門荒逕窄此日剪蓬蒿

無人知隱處古木伴荒丘茅屋三年築沙田七月收林  
疎休剪竹溪滿可行舟偶與鄰翁飲斜陽起更留

盆竹

種竹尋盆盎低迷似磻阿細聲兼雨有微影動風多長  
筍排針出成竿數寸過且無斤斧慮終老雪霜柯

盆柏

盆裏仙人柏千枝共一柯年深猶短小雨重却婆婆翠  
色孤松並繁陰片石多西來指禪意不敢問如何

予壯年時幽居山谷塵俗罕接惟與泉石草木  
為侶日徜徉其間醒悅心目而已年老力衰世  
移事改向之醒心悅目者反足以損靈亂思矣  
蓋所養於中者既異故應於外者自殊是以石  
失其貞而存其亂木失其美而存其惡泉失其  
清而存其汙草失其勁而存其弱理固然也因

成律詩四首以洩胸中之鬱抑呈錄同志庶知  
比興之有在焉

亂石爾何知摧輪剝馬蹄當途生礪谷在野礙鋤犁盡  
鍊天難補深填海自低點頭能聽法不信竟沈迷  
惡木經年歲空煩匠石尋遠看千丈勢不借一枝陰雨  
露恩多及風霜力少任終慚松與柏歲晚在高林  
汙流迷舊井何處汲清泠土壤難分色蛇蟲莫辨形空  
歌今世濁不照古人醒倘有神膠力無勞別渭涇



弱草不堪扶晴沙路更虛因風長自偃得雨始微舒車  
馬頻年路牛羊幾處餘生成由造物留補燒痕疎

哭壻游彥輝二首

獨老今誰記愁心重爾傷空期半子力翻哭少年亡兒  
女存孤幼鄉閭失善良秋風歌楚些衣上淚千行

爾病書頻報吾憂力不支論方迷善藥任術值庸醫剪  
紙招魂日臨棺灑淚時相看茲壻意更盡九泉期

送卓叔良回三山二首

老伴全稀少斯文又寂寥送君歸故里惱我在今朝扶  
病一言餞去程孤棹遙黃花滿三徑秋興未蕭條

諸孫遠迎侍獨老久懷歸東擔琴書古還家鄰舊非掃  
松經故隴采菊授時衣八十免為客庭柯倚夕暉

舊業

谷口留茅屋谿南廢樂園風高愁欲破地濕想宜翻寂  
寞三間足甘辛數品存素懷安舊業清苦訓諸孫

挽陳景章

禪笠頻相訪，儒衣忽自謀。  
十年勞火宅，一日脫書囚。  
客舍黃金散，鄰僧白骨收。  
生芻何處覓，孤寺亂山秋。  
昨日偶聞訃，偏令老況哀。  
肯堂尋舊指，壽穴用先裁。  
竹徑風時掃，柴門月自來。  
往還二十載，只似夢初迴。

東伯頴

聞說重陽日，王弘厚客情。  
風流同酒興，博雅盡詩名。  
罵坐誰先起，揮毫或後成。  
黃花莫相笑，謬誤豈平生。

題吳德賜山水小景

雲山分遠近，水石助清幽。  
老眼看名畫，深懷似故丘。  
草迷行鶴逕，藤引釣魚舟。  
賣藥忘機者，無人識伯休。

五言排律

題劉子長留耕圖

原隰春山遠，門廬礪水斜。  
三忠先世澤，五畝舊生涯。  
小圃連喬木，疎畦帶落花。  
種苗侵雨露，去草撥泥沙。  
已佩平安訓，何論賦斂加。  
簞瓢分菽水，衣褐給桑麻。  
耕鑿無多地，流傳有幾家。  
從知瓜瓞頌，不為古人誇。

欽定四庫全書

藍山集卷三

明 藍仁 撰

七言律詩

新創譙樓美邵令

大棟層軒俯廣庭南山遠送武夷青  
五更畫鼓先迎日百尺雕欄近列星  
漏點分明知善政齋居高爽挹仙靈  
從今清獻梅花月祇向春風角裏聽

寄雲松

雲松隱者巢居處上有屏山下藉溪花遲夕陽眠鹿豕  
釣磯春雨集鳬鷺十年種木春林遠萬卷藏書草屋低  
久欲相從扣藏書負琴長往碧巖西

次雲松訪復嬰宿萬年宮

聞道尋仙叩洞門清溪古木路斜分桃花滿地飛紅雨  
橘樹懸崖漲綠雲講罷先天烟篆冷夢回斜月玉笙聞  
高秋也欲扶衰病共候山中白馬君

代簡雲松

世事紛紛未息肩  
雞羣鶴處尚翛然  
故山可隱人將老  
佳夕相思月再圓  
稚子久嗔陶令出  
諸生休嘆孝先眠  
他時定有公車召  
正及先生矍鑠年

擬雲松簡彥民

詞翰知名有幾人  
東家住近不相親  
久傳筆勢行蛇蚓  
又說詩篇照鬼神  
伐木未聞鶯出谷  
停雲空望雨清塵  
春風門巷蒼苔遍  
獨少林逋履跡新

候雲壑不至

柴門久候故人風不見巾車入谷中王子已回清興盡  
陶潛猶憶素心同餘年自卜床頭易清響誰分爨下桐  
一片白雲天際起晚來猶自戀前峯

春興

穆穆煙柳早鶯啼喚起春風送杖藜花映前川紅遠近  
草迷長路綠高低流光冉冉增惆悵往事悠悠倦品題  
安得一尊長在眼夕陽林下醉如泥

題春山訪隱圖



遊山有興未從容  
偶向君家閱數峯  
水泛落花凡幾曲  
雲開遠岫似千重  
茆堂有約琴尊共  
蘿逕何時杖履從  
避世老翁頭雪白  
風前徙倚聽長松

題黃獻可所藏魚樂圖

春雲漠漠水平湖  
掉尾揚鬐羨爾魚  
自笑山林雙目短  
不知江海萬形殊  
桃花浦口鉤虛擲  
蘆葉磯邊網自疎  
歲久只愁頭角異  
風雷相送上天衢

題畫龍

淮水歸舟數客程傳看龍挂雨初晴九重天際騰身近  
一聚雲間掉尾橫此日畫圖存彷彿何時文象應文明  
風雷瀕洞西窓夜祇訝僧繇已點睛

題雲翁龍

畫龍近代數雲翁下筆斯須變化同漠漠天陰連海水  
紛紛雲氣逐谿風偶看全體驚垂老安得真形走畫工  
紈素蕭條懸壁堵不為霖雨夢高宗

題朱士堅屏山隱居圖

臨川城外隱君子兒孫滿目自繩繩三世喜聞詩禮學  
一門獨著孝廉稱上堂綵戲春多酒滿屋書聲夜有燈  
盛大豈容終隱逸白眉先起任賢能

翠屏山下卜幽居秋水荷花十里餘  
避世已甘棲畝畝起家何負讀詩書  
近聞拔萃遊京學又見求賢擁傳車  
年少功名方快意早持恩誥入門廬

春日憶章屯故居

衰年長愧北山靈春日題詩憶翠屏  
茆屋也從人借住

柴門不為客來扃  
林陰嵐濕藏書架  
爐冷苔侵煮茗瓶  
惆悵閒牕巾幌在  
孤墳宿草已青青

世事浮雲變換多  
歸耕仍覓舊煙蓑  
城邊老屋他人住  
溪上荒園此日過  
社燕已非尋主入  
林鶯還是為誰歌  
角巾喜有隣翁在  
閒與庭前盼樹柯

石村卜居候程芳遠

數日遙聞駕犢車  
青囊貯得異人書  
山前再宿辭仙館  
雨後長吟候野廬  
竹徑漫期羊仲入  
鹿門偏愧德公居

子孫能守平安訓二頃山田也有餘

題趙子庸古木居卷

趙子西江古木居客遊未返十年餘蛟龍倔彊垂當戶  
蝌蚪流傳貯有書風雨每嗟鄉夢遠塵埃近覺宦情疎  
鄰人喜遂歸來願落葉荒苔并掃除

寄武夷張郭二山人

天壺峯頂日月轉星渚橋畔雲烟垂青谿道士騎黃鶴  
白髮老翁歌紫芝濁酒欲謀他日醉丹砂須作後天期

塵埃滿眼不歸去  
洞裏桃花空夢思

懷張蕪善

社酒醒來曾送客  
秋山望斷未還家  
雨聲門巷蕭蕭葉  
霜信園林采采花  
念我草堂初伐木  
候君松徑自煎茶  
角巾藜杖隨詩興  
十里青山日未斜

雪中抵竹梅齋

衝風冒雨轉幽崖  
雪滿長空夜色催  
客枕有時驚折竹  
遊帷無處認寒梅  
野人籬落孤烟迴  
茆屋瓊瑤幾尺堆

掃入公家徵斂足，冰山不願太陽來。

為雲壑題雪友墨梅

歐陽筆下開冰雪，竹外橫斜見一枝。  
庾嶺獨憐春色早，羅浮相憶月明時。  
山間自伴幽人隱，林下長歌處士詩。  
老我歲寒頻對此，白雲幽壑共心期。

題徐士振蜀路看梅卷

綵服曾遊錦水濱，見梅如見故鄉親。  
當時鼓棹難為別，此日揮毫欲寫真。  
萬里蜀山頻入夢，一枝春色遠隨人。

歐陽翰墨名當代贈爾寒梢數萼新

贈汪亦雪

三年無處問平安一日相過異地還  
自說暫離人鮪甕也知生出鬼門關  
園林但有中宵夢塵土都非壯士顏  
祇恐龍泉埋古獄夜深紫氣斗牛間

贈葉彥新

石林居士日相親溫雅如君復幾人  
脫却時名棲寂寞吟成詩句轉清新  
清溪九曲宜垂釣茅屋三間可卜鄰



我亦平生憂世者近來雙鬢白如銀

贈吳彥敬

卜居何論買山錢喜有南鄰二仲賢門徑新開疎種竹  
池塘分斷半栽蓮客來酒缶牆頭過兒學書籤架上懸  
況是世交同繼業林間猿鶴倍欣然

贈張蕙善

贈人相識自平川又會松軒炙石泉惆悵望雲懷故舊  
周流觀世避英賢河圖擬究成書際義易應參未畫前

頗訝華山陳處士白雲深處至今眠

贈歐陽亦雪

歐陽處士有行窩束擔琴書處處過肘後藥分丹火秘  
雪中梅放墨花多老來懷抱思傾寫病起筋骸費按摩  
聞與赤松黃石伴樓居此日意如何

贈西山本淳

先代誅茆傍翠岑他山猿鶴也投林藥苗散漫冬無雪  
桂樹團欒月有陰高枕白雲同靜境揮絃流水入清音

酒仙唯數張顛健釀得流霞每共斟

贈葉宗善兼復嬰

武夷宮裏葉高士方外同遊獨老成  
秘訣隱文參古學清辭麗句負時名  
餐霞直上陽崖遠采藥歸來夜月明  
久別鄰菴余復古西風鶴背許相迎

再贈西山本淳

穴處巢居避市廛南山構架白雲巔  
風高茆葦三重掩澗險藤蘿百尺牽  
旦食有狙分芋地春耕無犢廢芝田

野人不但貧輸力甲首敲門橫索錢

賡張宗翰舟過武夷述懷

丹霞白鶴洞仙宮絕頂當年避地同  
春雨磯頭憂巨浸夕陽林下眩殘虹  
先幾自合乘槎去投老方驚墮甑空  
九曲櫂歌期再聽寄聲鷗鷺少從容

荒榛滿目故儒宮憶昔風雲樂趣同  
年代已隨川上水文光無復斗間虹  
黃埃赤日遮平地高石層陰起半空  
昨暮維舟西渡口濯纓猶勝抗塵容

甲寅仲冬予攝官星渚本邑判簿李公以催租  
入山忽遊武夷予命小舟追之不及是夕宿常  
菴溪風山月一時清興王事靡盬明日即附舟  
逆流而上因憶曩時與石堂盧使君同遊放懷  
山水一觴一咏其樂不可復也援筆書懷遂成

唐律二首

休日相期上翠微出門頗覺事多違小舟送酒來何及  
獨騎看山去又歸山月抱琴尋澗水天風倚杖叩巖扉

烟霞一榻無人共夢繞瑤臺跨鶴飛

清溪九曲遂真遊已覺雲山笑白頭  
緩轡未能隨後騎叩舷聊欲借前舟  
先朝故老偏相憶此日虛名不自由  
從事獨賢何足問烟波慚愧舊盟鷗

次劉彥炳武夷見寄

故人十載別平川清夢時時共釣船  
采藥重來俱白髮聽猿有恨落蒼烟  
山頭掃月還相待水底看松似倒懸  
竹洞雲巖秋老盡晚晴猶喜兩峯連

次丁郎中遊武夷韻

九曲清遊興不窮  
舟人指點看仙蹤  
雲開釣艇橫丹壑  
月落鳴機在碧峯  
道士金丹誰化鶴  
仙人鐵笛莫驚龍  
明朝匹馬尋征路  
回首東南紫翠重

賡馮老泉

山中久住豈無情  
偶為尋詩出谷行  
歲宴龍蛇當伏蟄  
春和鶴鶴自翔鳴  
眼空江海栖栖老  
興近烟霞往往清  
林樾後來俱特達  
侯門彈鋏舊知名

題沿山王那海千戶澄清亭

綺戶朱疏面面遙不知城郭有塵囂石巖雲氣何蕭爽  
池水天光共沈寂楊柳梧桐分處處鴛鴦灘鷁並朝朝  
杜陵也有南塘興題向將軍第五橋

送陳子敬歸三山

石頭城下住經年鄉路重尋谷口田千里客愁淮水上  
三山歸興海雲邊故園松菊陶潛宅舊日才名鄭老璫  
舟泊武夷思仰止棹歌遺響墮空烟



松菊軒襍咏後再賦假山一律

兒曹暫得應門閒，疊石分泉作小山。  
碧草只疑行處盡，白雲如在望中還。  
四時花竹多生意，一日塵埃亦強顏。  
昨暮得書猿鶴侶，種來桂樹已勝攀。

題清源遊仙圖

海上神山只遠聞，圖中真景識清源。  
雲開秋色連蓬島，雨過春陰散石門。  
應有仙人騎出虎，定無逋客恨啼猿。  
人間歲月頭空白，安得流霞共一尊。

題方方壺風雲高仙圖

仙人來往馭飈車  
豈料遺蹤入畫圖  
林下曾逢騎一虎  
雲間常想度雙鳬  
千峯夜月簫聲遠  
萬里晴天劍影孤  
未遂滄州瑤草願  
夢隨飛珮過方壺

和雲松過鶴田有感

清溪松竹故人居  
門掩東風寂寞餘  
一束生芻將老淚  
數編殘稿訪遺書  
丘墳已卜山林近  
堂構仍聞歲月虛  
回首平川應不遠  
棹歌微響復如初

題海好問西湖霜月軒

華軒南敞對湖船，有客絃歌夜不眠。  
楓落吳江霜正肅，潮生滄海月初圓。  
自吟肺腑寒光入，欲赴襟期爽氣連。  
門外梅花凡幾樹，杖藜跼影訪逋仙。

題杜德基望雲軒卷

平川上有望雲軒，棟宇飄零舊扁存。  
遺墨猶能傳異代，承家應喜得賢孫。  
春風回首思先壠，秋色關心隔故園。  
百世詩書餘澤遠，草堂元在浣花村。

題聽松軒

野老林居入萬松曲肱高卧聽長風  
龍吟水底寒初起  
虎嘯山前氣更雄  
天籟未收人境內  
秋聲又挾海濤東  
客來剝啄驚幽夢  
彷彿鈞天曲未終

重經平川有感

壞道頽垣蔓草區  
眼中人世古今殊  
朱門五馬先朝貴  
白屋三徵此日無  
松竹不堪論舊事  
山林何處託潛夫  
月明誰唱滄浪曲  
欲問漁舟不可呼

荒園有感

一片荒園戰伐餘，主流落未安居。  
春來漫擬桑麻長，歲久誰將蔓草除。  
慨想農功難自棄，靜看人事不如初。  
道旁時有栽瓜者，烟雨纔分半畝鋤。

題黃仲文為孔方作松林樵者圖

伐木幽人入翠微，松間久坐澹忘機。  
百年霜雪高柯在，一曲天風古調稀。  
放筆擬將韋偃敵，攜書懶逐買臣歸。  
圖成寄示寧無意，伴我山中老採薇。

松下幽人不受呼低頭屈膝對雙株半空翠色連蒼鵠  
片石清陰轉白駒兀坐似忘浮世事乍逢應訝列仙癯  
廬山五老峯前路還有雲巢似此無

花朝偶成

一聲霹靂洗乾坤滿目青山帶白雲地底龍蛇驚欲動  
樹頭鳥鵲喜相聞鄰人買酒酬春社野老携書就夕曛  
閒拂塵埃開匣鏡白頭微有黑絲分

寄劉仲祥索貢餘茶

春山一夜社前雷萬樹旗槍渺渺開使者林中徵貢入  
野人日暮采芳回翠流石乳千山迴香簇金芽五馬催  
報道盧仝酣晝寢扣門軍將幾時來

謝盧石堂惠白露茶

武夷山裏謫仙人采得雲巖第一春丹竈煙輕香不變  
石泉火活味逾新春風樹老旗槍盡白露芽生粟粒勻  
欲寫微吟報佳惠枯腸搜盡興空頻

求河泊劉昌期貢餘茶

蒼顏白髮未投閒祇訝名蕪吏隱難月校舟緡留渡口  
春催茶貢住林間何年天祿然藜杖舊日霜臺借鐵冠  
聖代於今偏敬老幾人半俸卧柴關

河官暫託貢茶臣行李山中住數旬萬指入雲頻采綠  
千峰過雨自生春封題上品輸天府收拾餘芳寄野人  
老我空腸無一字清風兩腋願輕身

雲壑寄惠黃楊木簪并詩

黃楊為木至精堅寸幹三春長未全偶乞餘材簪短髮



魚煩佳句寄衰年  
擗冠不用傍人整  
櫛笠還宜覆頂圓  
慚愧病軀梳沐少  
鬚鬆雙鬢日高眠

九日席上呈蕙善伯壽

九日歡遊處處同  
微軀僵坐似枯松  
強開桑落招詩社  
倦插茱萸到病翁  
張子思歸心漫苦  
劉郎題咏意先慵  
瓦盆到手俱拚醉  
天道無知伯道窮

盆松乃慈谷手植

瓦盆乞得小松栽  
誰撥霜根向斷崖  
盤屈豈能移本性

低回故欲困長材  
吞聲莫向秋風訴  
抗節從教臘雪埋  
更後千年枝已長  
仙人應化鶴飛來

盆梅乃林希玄寄惠

羅浮喚醒雪霜魂  
知是孤山幾代孫  
冷蕊疎枝低作幹  
蒼苔翠蘚近移根  
未論大用調金鼎  
已許平生老瓦盆  
歲暮徜徉三友在  
寒松瘦竹共柴門

托根盆盎似藏身  
五蕊三花小試春  
水月影隨燈火轉  
山林迹共市廛親  
隴頭不為行人折  
湖上空懷處士鄰

最念平生清白操偶拋霜雪傍光塵

瑞香

南園秋色盡凋零別有幽芳出遠林  
葉布綠雲晴靄靄花攢紅粟曉森森  
雪中吐艷爭春早露裏浮香坐夜深  
不與梅花同素淡時人少識歲寒心

兒時長記侍重闌頻向花前戲綵衣  
春樹婆娑低几杖夜香浮動襲屏幃  
用心霜雪開時早晦跡山林識者稀  
四十年餘看物變又扶衰病對芳菲

瑞香當作百花宗翠葉朱粧碧玉叢先得陽和開兩月  
也禁霜雪度三冬江梅比節終藏白仙杏同時合釀紅  
華石網中招不去山林歲晚強為容

嘗梨

庭前梨熟鬧兒童踏樹攀枝漸欲空一團削玉并刀下  
數片浮冰碧梳中療渴已能除痼疾嘗新何幸及衰翁  
仙人只愛如瓜棗安得移根種海東

送梨與劉鎮撫

自得佳名百果宗  
累累幾度熟秋風  
樹根頻掃林無蟻  
竹葉重遮谷有蜂  
揮刃即看冰片落  
登盤唯恐雪花融  
野人久念將軍渴  
遠遞雙筐手自封

送梨與雲松

百果稱宗品最奇  
餐冰噉雪食如飴  
十年雨露栽培力  
八月秋風採摘時  
登俎應知全味在  
傾筐還動故人思  
張公大谷猶多樹  
燕沒中園久不治

關雨

雲霓蹤跡未全消數日山中草木焦徒有世人祠土梗  
自無神力倒天瓢鄰床並汲愁枯井田舍相過嘆槁苗  
欲問天鈞誰主宰十年不聽太平謠

闕雨寄上官鍊師

七月三旬天不雨兩鄉百里井無泉連畦接畛枯將盡  
鑠石流金勢可憐江上雷雲虛作意山中草木欲生烟  
仙人不管蓬萊淺深瑣蒼龍洞裏眠

闕雨寄程雲壑

十處結淋九涸泉幾人奔走祇堪憐自焚虛擬之推死  
私祭難銷孝婦愆漸恐揚塵侵海水久知垂象動星躔  
梅峯隱者非忘世也向雲間禮孔仙

本真法師祈雨有感兼美武宗理

高士西山有異書流傳况是壁中餘蛟龍悉聽仙官令  
雷電能教旱魃除歲稔便當期鼓腹政成端欲賦隨車  
衰年病骨渾無賴一夜清涼入草廬

老泉索賦喜雨

苦熱真嫌夏日長片雲今夕作秋涼顛風未欲驚蒲柳  
急雨還能養稻粱病骨清冷唯穩睡吟懷衰老減疎狂  
馮唐過我談新咏扣戶先愁債未償

中秋

玉宇秋中月正明好天良夕祇傷情誰家庭院開樽俎  
幾處關山照甲兵白髮餘光聊自惜黃河倒影幾時清  
胡牀好盡南樓興莫向西風動笛聲

澆花



稚子銅瓶汲井渾一畦花木對幽軒已看潤色分枝葉  
更惜清陰庇本根溪澗龍移泉化土田疇甌折草連村  
老夫亦有蘇枯意無力穿雲浚水源

途中有感

泥途汨汨雨霏霏白黑誰能別是非何物功名真拾芥  
逼人富貴是危機刑章正密飛騰少禮樂方新揖讓稀  
槁木死灰忘世者杖藜回首立斜暉

問流人

道旁辛苦問流人非罪相看誤此身何用老成徒取辱  
久知溫飽不如貧衣裳臭穢沾床汗枷械拘攣滿面塵  
不自我先休嘆恨周餘靡有了遺民

夢歸

獨上江城倚夕暉西風點點鴈斜飛百年已半猶為客  
三徑將蕪苦憶歸老婦一秋常伏枕癡雖幾度候牽衣  
月明忽作還家夢九曲谿頭一扣扉

東張孟寬

醫官督稅想賢勞盟漱忘餐到日高倦執牙籌從會計  
偶憑烏几欲推敲舟車湊集須躬閱藥裏增除莫自拋  
此日虛名求實效研摩直恐數秋毫

東薛君玉

人生自古少合併鄰並應煩數送迎戎馬艱危猶旅食  
儒衣漂泊負才名有錢可買歸山隱無酒難為待客情  
傷心世事苦偏側可能白髮對河清

送薛君玉調江西憲榷

落花飛絮送殘春。濁酒清歌別遠人。憲府簿書淹歲月，  
宦途鞍馬傍風塵。湖邊有宅棲徐孺，城裏無山隱子真。  
羨爾奮飛千里遠，嗟余落魄二毛新。

夜坐

蕭蕭風雨坐相侵，共守寒燈抱膝吟。捫虱倦談當世事，  
聞雞還起濟時心。雲連烽戍兵猶滿，鴈度關河雪正深。  
此際正當明出處，且將書劍傍山林。

紙被

採得仙巖不老藤，蒸雲煮雪揭輕冰。  
光浮一片崑山玉，煖壓三冬內府綾。  
衣被生靈真有道，卷舒明晦亦堪徵。  
衰年朽骨寒尤甚，自擁蒙頭到日升。

立春偶書

八八衰年只緼袍，閉門春日自歌騷。  
一尊風雨心空壯，數畝田園興不高。  
黃卷但知賢聖對，白丁誰問子孫勞。  
不堪兩鬢蕭蕭雪，猶向人前作桔槔。

